



KEMENTERIAN PELANCONGAN,
SENI DAN BUDAYA
JABATAN KEBUDAYAAN
DAN KESENIAN NEGARA

KENYATAAN MEDIA

www.jkkn.gov.my

UNTUK SIARAN SEGERA

Bil.10/2023

KECERDASAN BUATAN (*ARTIFICIAL INTELLIGENCE*)

ANCAMAN ATAU KELEBIHAN PADA SENI BUDAYA TEMPATAN?

KUALA LUMPUR, 13 JULAI 2023 – Kementerian Pelancongan, Seni dan Budaya (MOTAC) menerusi Jabatan Kebudayaan dan Kesenian Negara (JKKN) pada hari ini telah melaksanakan program Wacana Pembangunan Produk Seni Budaya 'Kecerdasan Buatan (*Artificial Intelligence*), Ancaman Atau Kelebihan Pada Seni Budaya Tempatan? bertempat di Dewan Auditorium Mini, Pusat Pelancongan Malaysia (MaTIC).

Program yang berlangsung bermula jam 9.00 pagi ini bertujuan memupuk keinginan di kalangan para penggiat seni untuk mempelajari dan mempraktikkan keupayaan teknologi A.I dalam seni persembahan. Malah di dalam program itu juga, penggiat seni juga turut diberi peluang untuk menyumbang pengetahuan dan kepakaran masing-masing melalui jaringan kerjasama antara kumpulan teknokrat dalam teknologi A.I bagi mempertingkatkan kelangsungan seni budaya tradisi dalam era digital selain berkongsi maklumat antara para penggiat seni bersama pakar teknologi A.I yang telah diundang khas.

Kecerdasan Buatan (*Artificial Intelligence*) merupakan aplikasi digital yang berupaya meniru kepintaran manusia untuk “belajar menjadi pintar”. Dalam konteks ini, mesin dibangunkan untuk menyelesaikan tugas diberikan dan mempelajari serta memahami konsep untuk menyelesaikan tugas dan permasalahan. Dari sudut seni persembahan terutamanya seni tradisi, teknologi A.I berupaya mewujudkan unsur keaguman untuk menghasilkan paparan visual dan bunyi bagi meningkatkan bentuk

apresiasi penghayatan khususnya di kalangan generasi muda. Teknologi A.I dapat mewujudkan revolusi penghasilan karya seni untuk merubah landskap penghasilan karya kreatif dalam bentuk gerak, komposisi muzik, visual dan kesusasteraan. Teknologi A.I juga berupaya memudahkan penggiat seni menghasilkan sesuatu karya yang lebih bermutu dan bermakna menerusi cadangan karya seni dalam bentuk visual atau tulisan seperti penghasilan skrip pentas.

JKKN sentiasa proaktif dalam usaha membantu para penggiat seni diluar sana menghasilkan karya-karya seni yang terbaik selari dengan perubahan arus teknologi masa kini. Di samping itu juga, JKKN ingin membantu dalam mewujudkan kepelbagaian kepada para penggiat seni dari aspek penghasilan karya seni menggunakan pendekatan tradisional dan moden melalui teknologi A.I. Malah melalui platform ini, dapat memudahkan urusan pemasaran dan pembinaan penjenamaan karya seni masing-masing dengan menggunakan teknologi A.I itu sendiri.

Wacana pada hari ini dibarisi oleh panel-panel jemputan yang akan berkongsi berpengalaman dalam bidang masing-masing seperti Khairul Ikhwan Zulkefly (Gig Venture), Adil Hidayat (Pendakwah Teknologi) , Hazwan Hassan (Mid Journey Mahir Malaysia), dan penampilan khas YBhg. Datuk Mohamad Nasir Mohamed (M.Nasir) sebagai artis jemputan dan juga Irzal Kamal (Impressions Studio) menjadi moderator sepanjang sesi tersebut.

‘JKKN berharap agar karya-karya seni tradisi dapat dimodernkan tanpa perlu berkompromi pada estetika seni sedia ada menerusi kerjasama antara pakar A.I dengan penggiat seni. Ini adalah kerana teknologi A.I dapat memberi ruang yang lebih terbuka kepada penggiat seni untuk melebarkan sasaran khalayak dalam industri seni kreatif di peringkat antarabangsa melalui platform digital. Selain itu, penggiat seni dapat menghasilkan karya dengan peruntukan yang minima menerusi teknologi A.I tanpa perlu bergantung penuh pada bantuan kewangan yang besar. Program ini juga mampu merapatkan jurang perbezaan antara penggiat seni terutamanya dari kalangan generasi terdahulu dengan para teknologis dalam bidang A.I kearah mencari titik persamaan untuk perpindahan karya ke bentuk digital”. kata YBrs. Encik Mohd Amran bin Mohd Haris Timbalan Ketua Pengarah (Dasar dan Perancangan) JKKN dalam kenyataannya hari ini.

Bagi mendapatkan maklumat dan keterangan lanjut mengenai program ini, orang ramai boleh melayari media sosial JKKN melalui pautan www.facebook.com/mysenibudaya.

-TAMAT-

Dikeluarkan Oleh:

Unit Komunikasi Korporat

Jabatan Kebudayaan dan Kesenian Negara

Tel: 03-2614 8200 Faks: 03-2697 0786

Laman Sesawang: www.jkkn.gov.my **E-mel:** ukk@jkkn.gov.my

Platform Media Sosial Rasmi JKKN:

Facebook: @Jabatan Kebudayaan dan Kesenian Negara dan @mysenibudaya

Instagram, Twitter & YouTube: @mysenibudaya

Untuk Pertanyaan, Sila Hubungi

Mazidah Binti Mustapha Pengarah Unit Komunikasi Korporat, JKKN mazidah@jkkn.gov.my Tel: 03-2614 8200 / 012-952 2095	Eldawati binti Laung Pegawai Kebudayaan Unit Komunikasi Korporat, JKKN eldawati@jkkn.gov.my Tel: 03-2614 8200 / 019-8091805
--	---